

56
~~57~~

J. J. J.
DISPUTATIO INAUGURALIS MEDICA
DE
EPILEPSIA

quam
DIVINA ASSISTENTE GRATIA
Nec non
CONSENSU AMPLISSIMI SENATUS, ACADEMICI,
Et
FACULTATIS MEDICÆ DECRETO,
sub PRÆSIDIO

DN. GEORGII FRIDERICI
FRANCI de FRANKENAU,
Med. D. ac Profess. Publ. Regii nec non Coll. Consistor.
Assessor. & Fac. Med. DECANI,
Pro GRADU DOCTORIS

Summisque in Arte Medica honoribus & privilegiis ritè
consequendis

Publicæ ventilationi submittit


DANIEL HENRICUS PASCHKEN,

Regiomont: Borussus

Locò horisq; solitis


Mo. MDCCXXIV. d. 25. Januarii

HAFNIÆ,
Typis Joh. Georg. Höpffneri, Univ. Typogr.



Imprimatur.

G. F. F. de Frankenau.



VIRO

*PRÆ-NOBILISSIMO, AMPLISSIMO, atque
DILECTISSIMO*

**DOMINO
HENRICO
PASCHKEN,**

**Consiliario Civitatis Regiæ Cniphofianæ
meritissimo,**

**Parenti omni filiali amore æternum
prosequendo**

ut et

VIRIS

PLURIMUM REVERENDIS, PRÆCLARIS-
SIMIS PRUDENTISSIMIS,

DOMINO

Mag. JOHANNI LUDOVICO
COLBIO

Ecclesiæ Allenburgensis Pastori meritissimo,

Nec non ibidem

Inspectori Scholæ Vigilantissimo.

AFFINI ac FAUTORI Suo summo pere DEVENERANDO,

DOMINO

CHRISTOPHORO HENRICO
WEGNERO,

Ecclesiæ Lithuanicæ nec non Germanicæ PASTORI Fidelissimo:

Avunculo ac Fautori suo amantissimo,

DOMINO

Mag: JOHANNI FRIDERICO
BREHMER

Gymnasii Elisabethani Vratislaviensis Collegæ dignissimo,

PATRONO, Fautori, Parentis ad instar, mihi debito a-
moris affectu colendo,

Dominis, Parenti, PATRONIS, Fautoribus suis maximis,
plurimumque Colendis dissertationem hanc in grati
animi ac debitæ observantiæ signum cum voto omni-
genæ prosperitatis ac intemeratæ, salutis.

offert & consecrat

DANIEL HENRICUS PASCHKEN,



PROOEMIUM.



Arios inter morbos Spasmodicos, qui mirum in modum corpus nostrum infestare solent atq; excruciare, miserandus imò terribilis planè est affectus, EPILEPSIA communiter dictus, nulli parcens sexui nec ætati, & qui sæpius tam diris se prodit symptomatibus, ut neq; verbis satis exprimi valeat ejusdem gravitas, ipsisq; sensibus spectaculum exhibeat tristissimum: hâc etenim labe correpti incertò vagantur lumine, & instar trunci subito prosternuntur humi, jacent altò sopore sepulti, calor deficit, nervorumq; summa adest trepidatio, spuma ante os versatur, memoria labitur, caput titubat, atq; omnia membra cæco quasi quassantur impetu mireq; concutiuntur, adeò ut effatò Summi Viri, *Hippocratis nostri* ὁ δὲν εἶκεν ἐλέησι νόσοις, reliquis morbis nullâ re sit similis. Videtur namq; hic bellum intestinum, nullaq; adest vis externa, contorquentur membra, variis motibus agitur corpus, malum interiora occupat, machina ipsa corporis nostri vim patitur, dum laxis habenis effervuntur omnia, cessat rationis imperium, ipsumq; adeò corpus internò suo cruciatur carnifice. Notissimum est omnibus, qui scripta versarunt doctissimi atq; expertissimi Viri *Job, Cratonis à Kraftheim*, trium Imperato-

rum Medici quondam dignissimi, votum, quô peroptavit, ut sibi ante vitæ suæ exitum intimius hujus morbi cognoscere liceret genium; proin nobis, ceu tironibus, nemo vitio vertet ulteriolem instituere conantibus disquisitionem specimine hōc inaugurali de perquam gravi isthoc corporis affectu, si rem non semper acu, ut est in proverbio, tetigerimus, atq; indolem morbi penitus exhauserimus humanitatis nostræ probè memores. Faxit interea Numen benignissimum, ut labor iste cedat faustissimè, cœptisque nostris clementer annuat.

§. 1. Si ullo alio in morbo, certè in hoc multa circa nominis evolutionem occurrunt notanda, sive etymologiam spectes, sive synonymiam ejus; Etenim **EPILEPSIA** origine vox est Græca, & apud *Hippocratem* 2 *aqb.* 45 & 3 *aph.* 29. tum alibi sæpius invenitur, & dicitur ἀπὸ τῆ ἐπιλαμβάνειν quod Lexicographis significat prehendere, invadere, eo quòd plerumq; subito ac quasi ex insidiis hominem nihil tale cogitantem, aut sibi metuentem apprehendat; nec tantum aliquâ sui parte, ast secundum omnes primarias ipsius functiones hominem prehendat & corripiat. *Hippocrat. libr. de æere, aquis & locis* appellat παιδίων πάθος *puerorum morbum*, quia tenera ipsorum ætas huic calamitati inprimis est obnoxia. Porro *morbus sacer audit*, eò quòd crederent illum divinitus locò pœnæ hominibus immitti, vel quòd afficiat partem, quæ verè sacra & mentis sacrariū, est, dignissimam, cerebrum nimirum; Item *Herculeus*; quòd Hercules eò correptus in ipsa sævitia filios interfecerit, dicitur, tum à morbi magnitudine & sævitiae impetu. A Latinis autem vocatur *caducus*, à casu in terram, it; *comitialis*, à *Seneca* Viti.

vitium comitiale *libr. 3. c. 10.* vel quod in comitiis aliis-
que hominum congregationib⁹ laborantes interdum in-
festarentur, vel potius, quòd comitia, in quibus aliquis
Epilepticus ità cecidisset, dirimerentur; quod suò etiam
suffragiò confirmat *Q: Serenus Sammonicus* hīs versicu-
līs :

Est subiti species morbi, cui nomen ab illo est,
Quod fieri nobis suffragia iusta recuset;
Sæpe etenim membris acrí langvore caducis
Concilium populi labes horrenda diremit :
ab aliis *Lunaris* appellatur, quod vel in novi - lunio vel
pleni-lunio nati soleant eò morbò sæpi⁹ corripī: vel quod
à lunæ phasibus ac influxu maximè dependere credatur:
item *Sonticus* dicitur ob noxæ gravitatem, quæ justam
absentiæ excusationem in judiciis afferebat, teste *pliniò*
libr. 36. cap: 9. Gelliò libr. 20. cap. 1. Nonnunquam *Sputa-*
tus insignitur, quòd insputare apud priscos salutis esset E-
pileptici. *Paracelsus paramir. libr. 1 de orig. morb. ex tribus*
primis substant: cap. 6. morbum vocat à remedio vitrio-
latum, viridellum, eò quòd hæc species caduci à vitrio-
lo præsentissimum nanciscatur auxilium. Nobis *Germa-*
nis audit, die fallende Sucht/ Fraß/ schwere Noht/ schwer
Gebrechen/ schwere oder böse Krancfheit/ der Wehetag/
die Sichter/ das Ubel/ das Elend apud Saxones, a B. *Va-*
lentino, die stürzende Seuche.

§. 2. Huc referri meretur, quod *Willisius* refert de
quodam Theologo, qui Dæmoniacos in Novo Testamen-
to habitos Epilepticos fuisse conjectat, vid: ejus *Patbol:*
cerebr. cap. 2. hinc forsam etiam à nonnullis Dæmoniacus
morbus vocatur, vid. Illustrem *Thom: Bartholinũ*, &c. Alia

quidem plura Epilepsiæ nomina coacervare possem, sed ut breviter hic agam, definitionem ipsam aggrediar.

§. 3. Data superius descriptione, quæ circa nomina recensenda occurrit, proximum est, ut ad ipsius rei declarationem nos conferamus, ita verò definitur. Epilepsia est motus convulsivus, plus minus repentinus, in quo membra corporis variè trahuntur, vibrantur & inordinatè agitantur, cum sensuum exercitio quocunq; ut plurimum abolito durante paroxysmò, post aliquot dies, imò menses, vel annos interdum recurrens, teste quotidianâ experientiâ.

§. 4 Genus seu ratio formalis Epilepsiæ, in quo consistat, non unanimis est Autorum sententia, quia non solum morbus est complicatus, sed etiam plures occurrunt actiones læsæ, tantâ magnitudine & vehementiâ, ut quænam præ altera magis attendenda sit, non adeò liquidum existat. Potissimum tamen duæ heic præ reliquis sunt præcipuæ: functionum scilicet principum, sensuumque tam internorum, quàm externorum læsio, cum totius corporis motu convulsivo per vices affligente.

§. 5. Cum itaque *Galenus libr. 3 de loc. affect. cap. 7.* morbum comitiales scribat esse convulsionem omnium corporis partium non perpetuam, ut in convulsione contingit, sed interpolatam, plerique hunc ducem tam Veteres, quàm Neoterici sequuntur, & epilepsiam per convulsionem rectè definiunt. Confirmatur assertum inde, quod illa in omni Epilepsia adsit, sive gradus ejusdem sit mitior, sive fortior: qualia exempla, præter alios occurrunt apud *Mercurialem Tom. 4. consult. 45. Holler:*

ler: de morb. intern. cap. 16. in schol. Marcell: Donat: libr. 2. cap. 4. &c.

§. 6. Si ulteriùs inquiramus, quænam pars corporis in morbo hoc primariò afficiatur, videmus, Auctores diversas abire heic in sententias: quorum nonnulli asserunt esse cerebri meditullium; alii meninges cerebrum investientes esse primarium Epilepsiæ subjectum atq; sedem; nam ubi spirituum animalium fons & animæ tam rationalis quàm sensitivæ domicilium communiter habetur, ibi principes facultates præcipuè læduntur, reliquis notabilem noxam faciliè hinc contrahentibûs.

§. 7. Nonnulli statuunt, imprimis affici processus cerebri ac Cerebelli, atq; his superstratas meninges à materia tali morbifica vellicari, unde spasmi & convulsiones immanes oriuntur: deinde à meningibus istis sic contractis & vellicatis unà cerebrum subito convullum valdè comprimi, simulq; nervorum caudices, quos utraqve meninx comitatur, in consensum simul trahi, & per consequens sic motûs convulsivos pati, audacter asserunt.

§. 8. Multò aliam, imò receptæ contrariam de subjecto Epilepsiæ opinionem fovet *Quercetanus in tetrad. de affect: capitis, cap. 8.* in quibusdam Epilepsiis non cerebrum, sed cor primariò affici, contendens. Verùm, quibus opinionem suam confirmare conatur, rationes non sunt magni momenti: quamvis enim in quibusdam Epilepsiis cordis actiones simul lædantur, non tamen id semper fit, vel ordinariè.

§. 9. Hinc, licèt parùm intersit, utrum priorem vel posteriorem amplectamur sententiam, hoc tamen certum est, in perfecta & vehementi Epilepsia principatum

deberi læsioni functionum animalium principum tum & sensus, ipsam verò convulsivam contractionem, quæ per vices & paroxysmos succedit ab affectibus quoque interdum induci posse non diffitemur.

§. 10. Interim, quod formalis morbi ratio præcipuè in principum functionum læsione fundetur & consistat, planum & perspicuum est ex verbis ipsius Hippocratis libr: de flatibus cap. 22. Eò enim, quò corripuntur, à morbo, tempore, neque sentiunt quicquam; neque audiunt, quæ dicuntur, neque vident, quæ fiunt, neque ullos alios dolores sentiunt. Hoc iisdem penè verbis repetit & confirmat Galenus loco citatò & Trallianus libr. I. Cap. 15. neque aliud ipsa infallibilis ἀποψία svadet.

§. 11. Uti Apoplexia à quibusdam habetur Paralysis universalis; sic parì modò Epilepsia convulsio sive motus spasmodicus universalis dici potest; nam uti in omni convulsione & spasmo partes nerveæ ac tendinosæ contrahuntur, ac tenduntur nonnunquam satis dolorificè; sic quoque in Epilepsia contractio partium spasmodica nervosarum & musculosarum universalis est per totum ferè corpus.

§. 12. Contractio autem hæc fit à concitatori, acriori & inæquali influxu spirituum animalium in spinalem medullam & nervos, obstructis enim tubulis cerebri, per quos spiritus solebant fluere, necesse est, ut majori impetu tunc spiritus fluant per cæteros apertos tubulos & canales, & quoniam inordinatus planè ac tumultuarius talis Spirituum est motus, ac extra æquilibrium positus, tunc animæ & mentis Imperio non auscultat amplius, quare sensus tam in-quàm ex-terni cessant. Unde ali-

aliqui etiam spasmus & Epilepsiam dividunt in externam, quando membra externa, brachia, oculi, pedes &c: afficiuntur; Et internam, quando viscera interna, nerveo membranosa afficiuntur, uti fit in colicis convulsivis, nephriticis, hysteriis, &c. passionibus.

§. 13. Imprimis autem in Epilepsia, quæ motus est convulsivus in quo membra corporis variè contrahuntur, & agitantur, sensuum exercitio ut plurimum abolito, sub sua latitudine species tres seu gradus communiter à Pathologicis scriptoribus assignantur: gradus ejus primus pertinet propriè ad vertiginem caducam, & abusivè Epilepsiæ tribuitur, quando nempe ægri subito concidunt in terram, quasi somno sepulti, sed sine spasmis aut convulsione. Secundus gradus est, quando variis motibus corpus agitur; v. gr. Saltando, ridendo, pectus percutiendo, ridicula narrando, &c. sensibus autem aut integris, aut in delirium abreptis. Tertius gradus est ex prioribus conflatus, ita ut omnis tam sensus, quam rationis usus pereat, simulque variis motibus corpus agitur, dentibus stridunt, brachia jactitant, pollices arcuè in manu claudunt, pedibus tremunt, corpus insigniter attollunt, incurvant. spuma per os rejicitur, lingua morso læditur, &c. Quibus omnibus successivè remittentibus æger tanquam somno oppressus jacet, & ad se rediens anteaكتورum nil omnino scit: Saltem de perturbatione capitis, & omnium artuum gravi lassitudine conqueritur. Primus gradus est vulgatissimus; Secundus rarissimus. Tertius ægros quasi pro obsessis à Dæmone repræsentat, nisi Medici scientia innocentiam ægri defendat.

§. 14. Ejusmodi casus mihi ante annos circiter duos, in Silesia tum temporis degenti, se conspiciendum exhibuit, ut adstantes certè pro obsessio haberent, nam gravia symptomata aderant, corpus enim mirum in modum elevabatur, mox pedes capiti appropinquabant, mox incurvatis manibus & brachiis jacebat, variæque aliæ graviores gesticulationes accedebant, inter horæ autem spatium quando paroxysmus mitigatus parùm remisit, nihil scivit eorum, quæ antè ab ipso erant facta, saltem de perturbatione mentis querebatur, hinc petiit, ut darent ipsi aliquid ad comedendum. Accedens Medicus falsam opinionem adstantium refutavit, demonstrando illum non esse obsessum, ut vulgò credebatur; cessavit quidem per aliquot tempus hic paroxysmus certò tempore autem se iterum videndum præbuit, & quamvis Medici propinarent optima antepileptica & specifica, tamen non curatus, sed saltem mitigatus fuit affectus. Patet igitur hinc morbum ipsum in tertio gradu fuisse, qui vix ac nè vix quidem curationem aliquam admitteret.

§. 15. Cum autem impossibile sit, feliciter morbum aliquem curari aut præcaveri posse, nisi prius causa, à qua immediatè dependet, accuratè sit perspecta & explorata: eapropter & nostrarum omnino partium esse puto, ordoque postulat, ut ad indagandas causas, quantum quidem fieri potest, nunc inquiram paulisper.

§. 16. Causa igitur immediata hujus malierit impetuosa, rapida & maximè violenta spirituum animalium explosio, diversimodè ac inordinatè membra concutiens & agitans motus, in spasmodis quidem continu-

us,

us, at in Epilepsia interruptus, inordinatus ac perturbatus.

§. 17. Inter causas mediatas propinquiores meritò referatur irritatio præcipuè generis nervosi, quippe spiritibus animalibus cerebri incolis impetuosius motis, brevi post reliquæ partes totius corporis tam internæ, quàm externæ, in consensum trahuntur, atque diro sic malo, Epilepsia, corripuntur. Id ut meliùs exprimeret *Galenus libr. 3. de loc. effect. cap. 7.* declarat rem exemplo ventriculi, quando à re molesta & acris stimulatus, singultu tum afficitur: ità ex irritatione stomachi à medicamento antimoniali vel cathartico fortiori fit vomitus: ex irritatione cordis fit hujus palpitatio, unde etiam *ab Avicenna* ejusmodi irritationes, stimulationes, & rei molestæ expulSIONES, parva Epilepsia vocantur.

§. 18. Causas inter secundas mediatas recenseri potest, quicquid præter naturam nervos irritare, & acrimonia sua atque peculiari qualitate nervoso generi infestum est, sive in cerebro ipso, sive in alia corporis parte hæreat, sive ab extra cerebro communicetur. Talem malignam quasi auram, cerebroque adversam, suppeditare possunt omnis generis humores corrupti, sanguinis vel feri stagnationes, tum sanies, in quacunque corporis parte hæreat: v. gr. in ventriculo saburræ acidæ, & bilis porraceæ seu æruginosæ coacervatio: in intestinis progenies verminosa; in utero secundinarum à partu remora, seu sanguinis menstrui suppressio atque retentio diuturnior: item quando infans nutritur in utero impuro sanguine, & jam in lucem editus lacte corrupto aut accessente, teste, *Galeno libr. 3. de aliment. facult. cap. 14. & 15:* Huc facit etiam dentitionis tempus secundum, *Hippocrat. libr. de dentitione.* item abscessus in cerebro, cranium cariosum: corrupta à sanie vel à festucis læsa dura Meninx, ut & apostemata varia atque similia ulcera maligna.

§. 19. Ad causarum remotiorum procatacticarum classem pertinent ea quæ materiam morbificam commovere, & la-

tentem illam διαΐεσις in actum deducere valent, ut sunt : mora diuturnior sub radiis solaribus, vel lunaribus, ut & in balneo calidiorē, vide *Hippocr. libr. 6: cap. 3. de tuenda sanitate*: ventorum vehementia seu inclementia, imprimis verò australium seu meridionalium; huic malo favet tunc & vehemens vociferatio, ingens atqve terribilis cœli tonantis fragor, tormentorum bellicorum propius audita explosio, similiumq; ex improvīso perceptarum rerum horribilis sonitus, adhæc Dæmonis ludibria, veneficia atq; incantationes, de quibus *Hippocr: in libr. de sacro morbo*. Porro crapula seu nimia vini generosioris aliorumqve inebriantium potulentorum ingurgitatio: vid: ejusd. *sect. 5. Aph. 5.* medicamenta purgantia fortiora, inedia, ut & immoderatus Veneris usus, uti legere est apud *Aretæum lib. 1. de curat: morb: chronic: cap: 4.* subita item animi consternatio, exercitatio immoderata, vehemens terror, ira gravis seu excarescentia, & plura alia animi pathemata, quæ huic malo fomitem præbere, & ad paroxysmos excitandos symbolum suum conferre possunt.

§. 20. Differentias Epilepsiæ quod attinet, earum vulgò plures ab Auctoribus recensentur: præcipua autem, & quæ ad curationem plurimum facit, est, quæ sumitur à loco, in quo materia illa acris morbifica, ceu hujus affectus causa potissimum generatur: unde alia fit per ιδιοπάθειαν, diciturq; essentialis, cerebri vitio proprio, aut etiam hæreditariò genita, quando ipsa dispositio Epileptica in ipso cerebro vel systemate nervoso hæret, cujus plura observantur exempla, in hac enim nulla præcedunt paroxysmi imminentis signa, solum de vertigine & capitis gravitate queruntur ægri cum torpore & depravatione quadam internarum animalium functionum, interdum quoq; sequitur fatuitas, & cum primis Lunæ phasibus auscultare solet; vel etiam ex lymphâ vitiosa, & acri in cerebri ventriculis stagnante, membranasq; & nervos vellicante infertur sæpe epilepsia, teste *Schneidero de catharris l. 2: p. 103.*

Symptomata autem fit in gravioribus doloribus, v. gr. dentitione difficili, dolore calculi, cardialgia, lumbricis ventriculo ac intestinis tenuibus inclusis, vel etiam post cerebrum vulneratum. & non ritè sanatum, propter fermentum nempe acre, ibi relictum, item post casum ab alto, ubi sanguis sub cranio cum tempore putrescere & corrumpi incipit, Epilepsia frequenter oritur: item ab ebullitione nimia sanguinis, uti in variolis, febribus malignis &c. Hæc facilius tollitur, sublata nimirum causa principali: Si enim dolor vel ebullitio nimia sanguinis sublata fuerit, tollitur & Epilepsia. Sic epilepsia quando paroxysmus paroxysmum insequitur, maximè periculosa est, non autem si periodicè & per longa intervalla recurrit; quod sæpissimè accidit, maxime circa Lunæ quadras, in novi-vel plenilunio potissimum.

§. 21. Porro Epilepsia est vel gravis, vel levis. In graviore æger in terram prostratur, brachia, manûs & pedes concutuntur & contorquentur, abdomen attollitur, os & lingua constringitur, oculi rotantur, contractio adest digitorum cum retractione pollicis; spuma adest ante os, & sensuum omnium Ecclipsis, & paroxysmus longius durat; quando ad se redeunt, ignari sunt omnium cum mentis stupore. In leviori autem, sentiunt ipsum paroxysmum accedentem instar auræ frigidæ per dorsum ab extremis partibus tendentem supra, & sic sæpe humi cadunt vertiginosi; spasmus adest & angustia præcordiorum; deinde etiam nihil sentiunt, nonnunquam recordantur omnium, quæ in paroxysmo fiunt, adsunt borborygmi & flatus in abdomine, corporis & membrorum gravitas, & paroxysmus tam longè non durat, & spontè suscitatur: jacent tamen nonnunquam in paroxysmo sine omni sensu ac motu; talem Epilepsiam sæpius observavi, & magis per consensum fuit producta, hinc & facilius graviore curari potest, graviore autem difficilius, maximè in illis, qui sunt supra pubertatis annos, & excedunt 20 vel 30. annum; si malum diu duraverit, memoria aboletur, & stupor mentis advenit; nonnunquam observata fuit in epilepsia tanta commotio cerebri, ut sanguis ex ipso naso stillaverit,

§. 22. Alia porro est inordinata, alia periodica, illa est, quæ per intervalla & periodos non certas recurrit, & semel extirpata non facilè redit; hæc, quæ certum tempus observat; cujusmodi annuam & periodicam annotatam vide *in Ephemerid: Cur: German: Anno XI. obs. 96. p 169. ut & celeberr. Th: Bartholinum in ætis Hafn: pag 150. sequ:*

§. 23. Distingvenda porro Epilepsia est in infantilem, & Juvenilem. Infantes, quorum intestina materia viscida & lacte corrupto non adeò sunt repleta, faciliùs curantur, maximè si sit sympathica; sæpissimè tamen jugulat Infantes, inprimis si respiratio difficilis simul sit conjuncta. Si à lacte tali corrupto Epilepsia introducta sit, & infantibus alvus non benè respondeat, optimi tunc habentur præter Clysteres emollientes & carminativos syrapi laxantes & aperientes; tali in casu præsentissimum arcanum est Sapo venetus in aqua aliqua carminativa parva quantitate solutus & propinatus, mire enim emollit alvum.

§. 24. Ratione causarum alia est inveterata, alia congenita & hæreditaria, per generationem sc: à Parentibus in liberos propagata, quæ vel nunquam vel rarissimè curatur: alia recens, & post ortum acquisita, & quæ ab humoribus corruptis varii generis producitur; alia rursus ab externis originem ducit, ut in vulneribus capitis & variis contusionibus gravioribus.

§. 25. Solet Paroxysmus talis certis temporibus quandoq; utpote diebus, septimanis, annis, postliminiò redire, Ratio est, quod tanto temporis spatiò opus sit, antequam materia peccans ursus in actum deduci possit, ut vellicando sic nervos, ferale hoc malum iterum excludat.

§. 26. Cognitis & exploratis jam morbi causis ac differentiis, progredimur nunc ad signa diagnostica, quæ ad methodum curativam viam nobis ostendunt. Sunt autem Epilepsiæ imminentis signa, extremorum frigus, visus hebetudo & obscuratio, in qua sine evidenti causa oculi caligant, iisque splendores ac scintillæ quasi observantur, nimirum agitatæ præter

ter naturam animalibus spiritibûs; *conf. doctiss: Barthol: Cent. 3: bist. 45.* Adest sonus interdum & tinnitus aurium, pallor faciei, nervorum trepidatio, tremor & membrorum omnium incerta & inordinata concussio & agitatio; Lingvæ inordinatus & cespitans motus, memoriæ labefactatio & mentis conturbatio, convulsio incipiens in collo aut dorso; æger præterea tristis est, & ut plurimum sentit capitis gravitatem, lassitudinem ac vertiginem: ubi jamjam adest initium accessionis fit veluti sternutatio ac oscitatio frequens cum incubo ac tussi, præcursoribus hinc dictis epilepsiæ *Doctiss: Petro Foresto Libr. 10, obs. 53.* quam totius corporis subita concussio & conqvassatio sequitur.

§. 27. Præsentis verò paroxysmi Epileptici signa per se satis sunt manifesta, & quotidie triste spectaculum obviis exhibent; dum subito sic prehensi cadunt in terram, vociferantur interdum & clamant, spuma ore exit, digiti contorquentur, præcipuè pollice ad volam contracto, stridunt dentibûs, ac variis motibus capitis, dorfi, brachiorum & pedum spasmodicis terram vel strata pulfant, interdum tamen nullum edunt clamorem ob spirituum interceptionem. Hæc autem in vehementi Epileasia contingunt, remissiora verò symptomata mitiori in gradu spectanda occurrunt, sicuti ex observationibus Practicorum quotidianis satis est notum.

§. 28. Cognoscitur porro ex borborygmis crebrioribus in abdomine, & subitanea hujus contractione, subinde & umbilici interiora versus retractione; quibusdam supervenit respiratio difficilis, & interdum metus suffocationis, quasi laqueus tracheæ injiceretur. sæpe feminis, fecum alvinarum ac urinæ involuntaria fit effusio, nunc stertunt, nunc vociferantur, nunc suppressa est vox, qualis strangulatorum esse solet: sunt, qui linguam exserunt, instar canis sitientis, aut acti in rabiem; dentes nonnunquam inter se colliduntur, claudunturque adeò firmiter, ut quasi diffringi eos putares, nec quicquam ori ingeri queat.

§. 29. Proin qui curationem rectè instituere intendit, is

probè gnarus sit, quo in loco fomes mali præsertim hæreat, an scilicet cerebrum nervorumque origo afficiatur per se & primariò, an utrò per consensum aliæ compatiantur partes, huicque malo epileptico ansam præbeant.

§. 30. Si causa vel sedes Epilepsiæ primaria insit cerebro, vel generi nervoso, plerumq; id arguunt ingens & ferè continuus capitis dolor aut gravitas; sensuum & memoriæ tarditas, pallor faciei, auditus difficultas, sonitus ac tinnitus aurium, sensuum torpor, vertigo tenebricosa &c.

§. 31. Si ex uteri consensu originem suam trahat, signa adsunt talia: nimirum menstruorum suppressio, secundinarum aut fœtus in utero mortui inconveta retentio, doloris circa uteri regionem perceptio, suffocatio uteri, abdominis crebra à flatibus distensio, difficilis respiratio, & cordis palpitatio.

§. 32. Si malum oriatur à ventriculo affecto: plerumq; præcedunt circa præcordia dolor summus, distentio & morsus ventriculi, inprimis orificii sinistri ejus, quod maximo sensu pollet, multisq; nervis instructum est, difficilis inediæ tolerantia, Anorexia, ructus post cibum acidi &c. si vermes in intestinis stabulantes in causa, apparent hæc signa: ægri nempe multum sitiunt, & sæpius alimenta appetunt, pruritus narium & morsum in intestinis sentiunt, in somno dentibus stridunt, tussis sicca eos vexat crebrius, & per alvum tum vivos, tum mortuos subinde lumbricos excludunt, unde totum corpus tandem tabescit & marcescit.

§. 33. Quod spectat ad eventum salutis ac mortis terribili hoc in malo, quidq; de salute ægri sperare liceat, dubii plena res est, variatque prædictio eundem morbi differentias ac gradus: omnium enim consensu pro morbo gravissimo & admodum periculoso habetur, sive per *ιδιοπάθειαν*, sive per *συμπάθειαν* afficiatur cerebrum, pars corporis nostri nobilissima: quæ quidem curandi difficultas in eo consistit, quod cerebri medullaris ac fibrosa pars non tantum ab ipsa causa morbifica, sed & à singulis, recurrentibus paroxysmis plurimum debilitetur
ejus?

ejusque pori adeò laxentur, ut deinceps materiæ cujusque heterogeneæ incurfibus facillimè pateant, adeoque ipsa *διὰ τοῦτο* morbofa repetitis paroxysmis sic confirmata radices altiores agat, ac dein ægrius tollatur.

§. 34. Aliàs fœdisfimus est affectus, ut etiam, *Aretæo* teste, si licitum esset mutuò cernere, quæ patiuntur ægri, vivere detrectarent. Interea Epilepsia, quæ fit ex consensu, faciliùs curari solet, quam illa per essentiam; in febribus malignis mortem, teste *Coo in aphor.* portendit. Epilepsia hæreditaria, & quæ post annum 25 evenire solet, rarissimè curatur: Juniores ætatis, loci & victus mutatio ab epilepsia interdum liberat; in pueris quidem pubertatis anni malum sæpe variant, sicut in puellis superveniens menstruatio: In paroxysmo, si ad usum sternutatorium non excitetur æger, indicium est naturam succumbere. Mulier gravida Epilepsia correpta communiter aut abortus aut vitæ periculum subit; licet hoc non semper obtineat, teste *Rhodiò cent: 1. obs. 60. & Schenkiò in observationibus suis*, ubi non omnes epilepticas utero gerentes abortum statim passas asserit Porro quæ caput sæpius & graviter affligit Epilepsia, hebetat tandem sensus, & rationis usum imminuit: hinc fortior juniore ætati obtingens paralyticam hujus vel illius membri impotentiam post se quandoque relinquit, in aliis verò hemiplegiam aut planè apoplexiam, id quod priorî pejus est malo, aut terminatur in stupiditatem, ac melancholiam ferè incurabilem. Si inveteratus aut confirmatus sit morbus, incurabilis itidem habetur; faciliorem autem contra pollicetur curam. si recens sit malum, & à leviori causa introductum, ut suppressione mensium, hæmorrhoidum, dentium ac variolarum erumpendi conatu, sanatisque subitò ulceribus manantibus in pueris. Habitualis epilepsia interdum in Hæcticam lethalem degenerat. Epilepsia ex uteri vitio contracta meliùs obedit remediis, malo hysterico medentibus: Solvitur aliquando Epilepsia, septimo mense, septimo vel 14. annò, vel primo accedente puerperio.

§. 35. Hæc

§. 35. Hæc de Epilepsiæ Diagnosi & prognosi dicta jam sufficient, restat, ut ad curationem ipsam accedamus: quid enim prodest affectum probè investigasse, nisi & sciamus è corpore eundem eliminare ac profligare? cui scopo satisfaciunt omnia illa à Præcticis laudata remedia, quæ vel præsentem tollere, vel imminentem avertere valent.

§. 36. Medendi verò methodus duplex communiter esse solet, monstratq; illa auxilia, quæ vel in ipso paroxysmo, vel extra eundem conducunt, & facienda monent; in hoc posteriori casu respiciendum est ad primas vias, an ibi sentina quædam expurganda lateat, vel non, in quo casu primò laudantur Vomitoria, uti vitriolum album, Tartarus & Syrupus emeticus, tum & purgantia atqve laxantia cholagoga & melanagoga veteribus dicta, ex Rhabarbaro, Helleboro nigro, jalappâ, scammono, aloë &c. parata. Secundò, si abundantia sanguinis sit in culpa, imminuunt venæ sectiones ac scarificationes. Tertiò. Lymphæ vitia corrigunt antispastica balsamica, temperata, uti sunt Essent: succin: Pimpinell: alb: alexipharm: Stahliani. Tinctura antimonii tartarifata, tartari, liquor: C.C. succinat: Decocta lignorum diluentia sanguinem, ejusq; acrimoniam attemperantia. 4to orgasmum sanguinis sedant Nitrata, præcipitantia & absorbentia atqve cinnabarina. 5to inter specifica anti spasmodica communiter recensentur lumbr: terrestre. legitimè præparati, unic: ver: C. C. philosoph. præparat: Tali leporis, ungula alces, cranium humanum, ejusq; usnea ex homine, violenta morte perempto defumta, spiritus volatiles urinosi omnes; uti C. C. salis ammoniaci, sal: volat: oleos: Sylv. Spirit: Polychr: ut & sanguinis humani vel cervini, ac similia, item radix & semen Pæoniæ, viscus quernus & corylinus, carbo sub artemisia effossa, Spiritus vitriol: ant-epilepticus Quercetani, ol: animal: Dippelii, tum & castoreata ac succinata omnia &c.

§. 37. Quoad ipsam curationem differt illa pro diversitate tum graduum, tum, subjecti, tum causæ, dum alia est idio-
pathi-

pathica five essentialis & universalis, quæ in cerebro residet, hocque principaliter affectum est, alia symptomata, five particularis, ubi per spasmus graviores corporis cerebrum cum ipsis nervis simul trahitur in consensum, & in hysteris & hypochondriacis aliisque locum habet: sic quoque cura adornanda est. In essentiali five idiopathica ante omnia eò respiciendum est, ut tubuli cerebri & nervorum referantur, & spiritibus animalibus æqualis & ordinatus per omnes tubulos motus concilietur. hinc in omni paroxysmo epileptico convenit, partes in suo situ detinere, nè adeò contrahantur pollices, & digiti, tum Spiritum volat. excitantem naribus applicare. v. gr. Rec. Spirit. apoplect. drachm. duas, Spirit. salis ammoniaci drachm. unam, ol. Rut: ol. Succi aq. vi. M. F. Spir. Qui Spiritus in omni paroxysmo epileptico naribus applicari, & si opus, labiis affricari potest, sic sæpe solent statim redire ægri: deinde os apertum servari debet, & mixtura talis, quæ partim Spirituum effrenem motum compefcit, partim etiam simul occlusos poros & tubulos aperit exhibenda. v. gr: Rec. aqv. Cerafor. nigr: è tenellis C: C: aqv, fl. lilior: convall: f. vinô a a unc. I. Spiritus salis ammoniac. drach: I. Syrup. papav: rhœad. drach. II. Essent. Croci drach: j. M. F. potio. Tertiò inungi potest nucha cum spinali medulla talî unguento. Rec. Axiung: human: ol: nucist. express: a a drach: ij. pingv. Castor: drach: j. aqv. Anhalt. unc: I. Spirit: salis ammoniac: drach: ij. ol: rut: vel succ: scrup: I. Extract. Castor. Scrup. sem. M. F. unguent: hœc linimentô sæpissimè inungatur non solum nucha & spinalis medulla, sed & scrobiculus cordis & abdomini applicetur cum panno linteo calido. Finitô ejusmodi Paroxysmô essentialî, optimè exhiberi, potest tale primò Emeticum: Rec. Mercurii vit: opt: præparat: gr. iij. aur. fulminant. Cinnabar: nativ a a gr. VI M. F. pulvis. hic pulvis instar arcani à Practico quodam celeberrimo in Anglia habitus fuit; vel felicissimo cum successu etiam talem mixturam, quæ simul purgat, possumus adhibere. R. Limatur mart. drach. j. Limatur. Veneris. Scrup. I. Limatur. Lunæ Scrup. ij. hisce affunde Spirit: nitri qv. satis, solve & filtra liquorem; de quo pro dosi dari possunt

gti, XL, unde æger non solum per vomitum, sed etiam per seces-
sum aliquoties summo cum effectu deijciat materiam tenacem
viscidam. Purgantia etiam hic locum habere possunt exhibita
vel sola, vel cum Emeticis dosi refracta. v. gr. Pulv. Gialapp. Scr.
I. Mercurii dulcis Cinnab: nativ: ãa gr: iv. Sal: succin: gr:
vi. Refin: gialapp: gr: iij ol. macis gt. I. M. F. pulv. Potest prolu-
bitu etiam admisceri tartar: Emet: vel Merc. vit: ad gr: ij, si opus
vel etiam Sulphur. antimonii aurat: benè præparati.

§. 38. Liberatis vel expurgatis sic primis viis plerumq; malum
vel remittit, vel plane cessat, tam in infantibus, quàm adultis;
durante ipso autem paroxysmò hæc non debent exhiberi, sed
extra Paroxysmum & tempore intermissionis semel vel iterum.
Purgantia leniora hîc nihil efficiunt, sed talia esse debent, quæ a-
cres viscidos humores incidendi magnâ vi polent, & simul altius
penetrant; qvalia sunt dicta jam. Præterea obstructiones profun-
diores cerebri tollunt cinnabarina, quæ non adeò nervis infensa
sunt, quàm mercurialia; debent autem propinari non in minori
quantitate, sed major, idq; repetitis vicibus. Sic in epilepsia à con-
tusione graviori facta, felicissimo c: successu aliquoties talis Pulv:
exhibitus fuit. R. Cinnabar. nativ. benè præparatæ drach. iv.
Succin: ppt: drach. iij ol. succin: svavior: gtl: vi. visci querni vel
coryli drach iij M. F. Pulv: divide in dos. xii. de his omni die assu-
mat æger doses tres in aqua appropriata. r: Aq. Cerasor. nigr.
lilior: Convall. fl. Tiliæ ãa unc ij. Syrup. de pæon. 3 iv. M. hic pul-
vis per aliquot septimanas, ad minimum duas, continuari debet,
& videbis mirabilem effectum, vel etiam locò hujus Pulveris su-
mi potest R. Tinct. lunæ vel veneris c. Spir. Salis ammon: Sal: vol:
C. C. bis de die expectando sudorem parata, præcipuè si suspi-
cio subsit vermium. Præter dicta parti primariò affectæ, nimi-
rum capiti, applicari debet emplastrum cephalic: quod mirabile
est in domando malo Epileptico R. Gum. Tacamahac: Mastich:
Elem: & animæ, Succin: ladan: ammoniac. ãa 3ji. ol: nucist. ex-
press. drach. iv. Balsam. peruvian. drach, iij herbæ mari veri
draeh ij. Cera q. s. M. F. l. a. Empl: quod applicetur raso capiti.
Sublatis sic obstructionibus in nervis, & roboratò capite, talia
porro

porro in usum vocanda sunt, quæ ferum Spirituum animalium motum temperant, fluidumque nerveum promovent & in debito motu conservant, uti sunt. R. Pulv. lumbricor. terrestr. secund: hum. ppt. vel Embryi leporis a a 3j. visc: quercini drach. semis carbon: tiliæ. cran: human. ungul. alcis. corall: rubr: a a 3ij Ciñabar. nativ. 3jii. Extr. visci querc. scr. I. Castor: gr: vi. ol. Lavend. vel roris marini: gtt. vi. M. F. Pulv. divid. in doses xxvi. de quo pulvere æger capiat quovis die dos: tres cum aq. lilior. Convall. vel antea descripta, sic auxiliante Deo Epilepsia certissime evanescet.

§. 39. In illis, qui sanguine crassiori abundant, potest habere locum infusum herb. thee, vel ejus loco herbæ roris marini, salviæ, Lavend. anthos. Malum si cessaverit, ad præservationem ulteriorem quolibet mense vel 6 hebdomade talis evacuatio conducet. R. Extr. Panchymag: Croll. Lig. aloës, Pæon. aloës rosat. a a ʒ. Extract. Trochisc. Alhand. Scr. Sem. mercurii dulcis Scrup. I. ol. fusc gtt. x. ol. Lavend. gtt. iv. M. F. I. a. Pilul: minores gr. I. magnitudine dosis erit ad summum scrup. I. dein spirit. talis frequenter erit assumendus. R. Ess. Castor. Salvolat. oleos. Sylv. a a 3ij. ol. Cubebæ. & Caryoph. a a gtt. iij. Ess: succ. Valerian. a a 3j. M. dos: gtt. xl. bis de die post prandium, vel cœnam horis tribus, nec venæ sectiones & scarificationes omittendæ sunt.

§. 40. Epilepsiæ Symptomaticæ, in morbo principali sublatâ, curatio est quærenda ac instituenda; ita in Epilepsia, quæ a dentitione difficili vel eruptione variolarum aut acriorum humorum ebullitione aut turbatione originem habet, talis mixtura succurrere possumus, v. gr. R: aq. fl. Pæoniæ, Til: lilior: Convall: a a unc ij Sp: Nitri dulcis vel vitriol. volat. 3j. Syr. Papaveris Rhœad. 3ij. M. detur; quæ mixtura egregie effervescentiam sanguinis nimiam & humorum præcipitat. Potest etiam, si opus, in gravioribus doloribus addi parum laud. opiat. vel Theriac. cœlest. vel etiam talis pulvis adhiberi in omni epilepsia symptomatica. R. Pulv: Marchion: cephal. Michaël. a a 3j. succin. Ciñab. nat. a a Scrup. I. M. F. Pulv. detur in aq. fl. Tiliæ cum Sp. C. C. Succin. parum acuata, quæ medicamenta etiam Epilepsiæ symptomaticæ in hypochondriaco & hysterico malo medelam afferunt.

§.41. In Spasmodica intestinorum ac ventriculi, maximè quæ in primis se viis exserit, optimum est, alvum apertam servare convenientibus clysteribus, nempe carminativus & emollientibus: dicitur enim hæc epilepsia colica convulsiva, & alvus ut plurimum est valdè adstricta, ubi ordinarii clysteres parum efficiunt. Clyster itaq; potest præscribi talis, qui ex decocto, emoll: cum appropriatis oleis constare debet. v:gr: R: ol. Lin. chamomill: coct. colocynth. ā a unc. Sem. fal: gemæ ʒij, M.F. Clyster & calidè sic hæc olea injiciantur. Externè scrobiculo cordis & abdomini potest applicari unguentum superius memoratum. it. internè propinari Eff. Castor. cum Sp. Sal. ammoniac. & eff. anod. & Croc. mixta addita pro re nata Camphor. applicari quoq; potest in ipso paroxysmo Sp. volat. C. C. aut Salis ammoniac. Plerumque adfunt in hoc morbo flatus & obstructions in primis viis, quæ Antimonialibus & Martialibus tollendæ.

§.42. Abstineat autem æger ab omni immodico affectu animi, ira, terrore, venere, crassis, flatulentis & acribus cibis, leguminibus, itemq; acidis; tum & à nimis lucubrationib9, & meditationibus profundiorib9 &c. ær sit temperat9, purus, seren9; vitandus frigidus, pluvi9 ac nebulos9, Lunæ radii de cumbenti quoq; noxii perhibentur, si peccet ær qualitate suâ, corrigatur arte, vel locus mutetur: vinô parcissimè utatur ob easdem causas supra allatas: Cerevisia nec lupulata nimis sit, nec lolii admixtione infamis; possunt huic in coctione ejus adjungi radix & semina pœoniæ vel bacc: junip: motus instituatur ante cibum, lenis, & exercitia ipsa corporis modum non excedant, secundum commune enim proverbium omne nimium vertitur in vitium: somnus quoq; sit moderatus, alvus semper aperta servanda, quæ si in munere suo segnior deprehendatur, arte sollicitanda est. Noxiam enim esse alvi adstrictionem hoc in casu experientia ipsa satis confirmat. Atq; hæc de Epilepsia dicta breviter sufficiant. Tuum erit L.B. singula æqua animi lance librare, & sicubi in difficillimo isthoc morbo cespitaverim, nec tuæ curiositati ubiq; satisfecerim, prono ex affectu prætermissa condonare. Interea Sempiterno Deo sit laus honor, & gloria in secula. AMEN.

Herculeum, PASCHKEN, pellens me-
dicamine morbum,

Hercule clavigerô major habendus eris,
Is Deus est, fecitq; viam sibi vivus ad astra.
Te quoq; laude Deus Phœb⁹ ad astra feret.

Hisce Nobilissimo & Experientissimo

Dn. DOCTORANDO

felicissimos in Medicina progressus gratulatur.

ANSG. ANCHERSEN.

Med: Cand,

Præmia virtuti debentur, gloria factis
Gloria nam studio stat peramica comes.
Fautor amice, trahit tua sic industria laudē,
Dum frontem lauru cingat Apollo tuam;
Dignus & omnino es, Tyriô quem murice
cingat

Phœbus, nam Medici nomen & omen
habes.

Scilicet intrepidus doctorū pulpita scandis,
Ingeniūq; tua suaviter arte doces,

Fulmi-

Fulmineô qvî homines clades epileptica
casu

Sternat, & in spumas oris hiantis agat.
Svaviter arte doces, sibimet promittere
quantum

Hæc hominum miserûm pallida turba
qveat.

Sis praxi felix! ægris solatia grata

Fer, Tibi langventes commoda mille
ferant!

Addere perge tuis virtutibus, addet honori
Posteritas; surget nescia fama mori.

ità

Summos honores

Nobilissimo Dn. DOCTORANDO

Amico æstimatissimo

Sincerè gratulatur

GEORGIUS RÖBEL,

S.S. Theol. Studiosus.

